

Ûn cudesch da «mütschatschieras» e tschiera aint il cheu

Il prüm roman da Flurina Badel es cumparü. Tschiera quinta dal tour cumgià da seis dachasa e dal cumbat cunter il marchà d'immobiglias da luxus chi fa svanir il spazi d'abitar pajabel illa val. Id es ün'ouvra politica, ma eir ün roman psicologic cun ün messagi profund.

FADRINA HOFMANN

Aita viva ed abita a Vienna cur cha sia mamma moura. Seis frars organischan la vendita da la chasa paterna ed Aita ha be amo da suottascriber il contrat. Las duos perditas – quella da la mamma e da seis dachasa – büttan cumplettaing suotsura la vita da la duonna giuvna. Seis anteriur conscolar Luis invezza es impli d'üna rabgia. Il possessur da la butia da cumün prouva da persvader a la populaziun locala da far frunt al marchà d'immobiglias da luxus chi diminuisha vieplü il nomer dad abitaziuns pajablas illa val. El as fa inimis e dvainta vieplü fatalistic.

Il prüm roman da Flurina Badel es fich politic. La tematica sta a cour a la scriptura ed artista da Ftan. Ella es eir co-presidenta da la societä Anna Florin chi s'ingascha per cumüns vivs e spazi d'abitar pajabel. «Mincha text da mai ha üna componenta politica, ma quella nun es plü importanta sco otras componentas sco per exaimpel quella psicologica in quist roman e la lavur cun lingua e poesia. Implü am para scriber ün roman rumantsch hozindi fingiä ün act politic», disch Flurina Badel.

Ûn tema cun ragischs personalas

l'roman vaja d'üna vart pella mort da la mamma e pel trauma da l'uffant creschü chi ha da gnir a bröch cun quai. La cumulaziun dal drama es in quist cas la perdita da la chasa ingio ch'ella es creschüda sü. Aita vain sragischada e's perda cumplettaing. Luis invezza persunifichescha il seguond tema central dal roman, nempe ils cumüns chi's svödan vieplü e dvaintan cumüns da vacanzas per persunas benestantas.

«Quist tema am staiva a cour fingiä avant chi'd es gnüda fundada la societä Anna Florin», quinta Flurina Badel. Cur ch'ella vaiva desch ons ha sia famiglia stuvü bandunar seis dachasa a Lavin. Adonta cha la famiglia ha fat müdada be a Guarda, d'eira quista experienza decisiva illa vita da Flurina Badel. Mai nun invlidarä ella il di da far müdada



Flurina Badel po preschantar seis prüm roman cul titel «Tschiera».

Foto: Alessandro Belluscio

cur cha tuot la chasada es gnüda chaggiada sün ün remuoroch e manada sur la via da Gonda a Guarda. Eir la pitschna Flurina d'eira sün quist remuoroch.

«Eu am sentiva s-chatschada da meis dachasa e vaiva la cartulina da Lavin amo blers ons sur meis let», s'algorda ella. Quel sentimaint profund da stuvair partir saja stat plü tard il motor per seis ingaschamaint ed eir pel roman.

Ingün manifest politic

Flurina Badel ha üna derivanza da migraziun sur bleras generaziuns. Ella es creschüda sü in Engiadina, es statta davent 16 ons ed es lura darcheu tuornada - il prüm a Guarda ed uossa sta'la cun sia famiglia a Ftan. Dal 2017 es nada l'idea pel cudesch «Tschiera». Quella jada vaiva la scriptura surgni ün stipendi per lavurar illa chasa d'art contemporanea da la Fundaziun Nairs. Dürant quel temp ha ella dudi differentas istorgias: da persunas chi han stuvü vender lur chasa paterna, da giuvnas e giuvens chi nu tuornan plü in val perquai chi fa massa mal da verer il svilup i'l cumün nativ, da dispittas dad iertas e da famiglias disperadas chi nu chattan ün'abitaziun. «Dal 2017 nu gniva discurrü in

Engiadina Bassa publicamaing sur dal fat cha la situaziun socioculturala as müda, chi vain discurrü adüna damain rumantsch, chi nu dà abitaziuns per indigens», disch Flurina Badel. Müdä s'haja quai culla pandemia, dimena cur cha daplü persunas benestantas da la Bassa han scuvert l'Engiadina Bassa sco lö da recreaziun, sco refügi. Eir quista situaziun vain descritta i'l roman.

Sülla dumonda scha «Tschiera» saja üna sort manifest, respuonda Flurina Badel: «Per mai nun esa ün manifest perquai chi vegnan resguardadas tuot las posiziuns». Uschea vain avant eir l'amur da possessuras e possessurs dad abitaziuns da vacanzas, ed il meglider ami da Luis es falegnam e viva eir da l'affar cun immobiglias.

Duos anti-eroes sco protagonistis

Cun Luis ed Aita ha s-chaffi Flurina Badel protagonistis chi svaglian empatia, chi seccan però eir - Luis cun sia rabgia chi til sta in peis ed Aita cun sia paralisiun chi tilla desdrüa. «Eu vaiva lösch l'impreschiun ch'eu vezza illa populaziun locala quists duos muosters: üna dischillusiun e rabgia uschè gronda chi'd es da partir o lura

üna paralisa chi fa taschair». Il roman descriuva üna situaziun dramatica, però adüna darcheu eir bels mumaints e scenas divertentas. Il cudesch as legia svelto, il möd da scriber da Flurina Badel es fluid, cun üna lingua fich elavurada e poetica.

Divers dialogs as basan sün dialogs reals. Las figüras nu descriuva l'autura in lur fisionomia. Eir il nom Guarda nu vain avant, adonta cha'l cumün descrit sumaglia ferm a Guarda. Eir las algorithmas d'infanzia correspuondan per part a quellas da Flurina Badel. Üna scena da clav es quella co cha'l Chalanderamatz vain preschantä be amo sco folclora pellas rotschas da turists.

Ûn cudesch plain tschiera

La citä da Vienna cugnoscha la scriptura svesa fich bain cun quai ch'ella ha stübgia e vivü a Vienna. Sco Aita lavuraiva eir ella adüna in cafes e quai i'l center turistic, dimena là ingio cha la citä autentica es morta. Vienna es però üna da quellas citats chi posseda bleras abitaziuns svesa e chi promovuva progets d'utilisaziun da fratemp. l'roman es quella situaziun üna sort contrapais a quai chi capita in Engiadina.

Il titel «Tschiera» as referischa d'üna vart als «mütschatschieras» da la Bassa, da tschella vart s'implischa il cheu dad Aita cun tschiera, ella as fügena in ün sentimaint da distracziun, as dischlokescha da la realtà. Mo id es eir blera tschiera i'l tema sco tal. «Per mai es quist roman ün documaint dal temp ed eir ün möd da transuormar ün tema chi m'occupa in üna maniera creativa», disch Flurina Badel. Cul cudesch less ella dar üna vusch a chi chi viva in Engiadina ed ha «mal il cour» pervi da la situaziun actuala.

Intant daja «Tschiera» be in rumantsch. Ün extrat preschainta Flurina Badel per tudais-ch a la Frankfurter Buchmesse chi cumainza l'eivna chi vain. Il böt es da chattar üna chasa editura pella versiun tudais-cha. «La litteratura rumantscha sto gnir tradüta per chattar sia via our il muond ed ün public plü vast», disch ella. Abitaziuns pajablas saja ün tema global. La perdita da cultura e lingua eir.

La vernissascha dal cudesch ha lö als 22 october a las 18.15 i'l Hotel Piz Linard a Lavin. Flurina Badel: Tschiera. Chasa Editura Rumantscha. 211 paginas.

La Punt vuol il «Müsella»

Cun diversas investiziuns ill'infrastructura scu eir in novas attracziuns vuol la vschinauncha da La Punt Chamues-ch surpiglier pass per pass il runel da skis Müsella, chi'd es auncha in possess d'ün investur privat. La suprastanza cumünela ho suottascriet üna declaraziun d'intenziun per pudair invier ils prossems pass.

Saja que per iffaunts indigens scu eir d'utrö - il runel da skis Müsella a La Punt Chamues-ch es üna da las prümas staziuns zieva il «Kinderland», quellas piazzas d'imprender ad ir culs skis pel pü i'l planiv. Cun sieu traget pütösch cuort, duos pistas blovas vantüraivlas e

bunas cundiziuns da naiv fin aint per la prümavaira es il runel cun plattins da La Punt perque ot stimo tar famiglias. Cha'l runel Müsella ho perque eir üna granda importanza pel cumün e sieu turissem, da que s'es eir consciainta la vschinauncha da La Punt Chamues-ch e vuol eir cumprer daspö divers ans il runel da skis. Quel es però pel mumaint auncha in possess d'ün investur indigen privat.

Surpiglier la magiurited d'acziun

Dürant ils prossem ans as dess que però müder, perche cha la suprastanza cumünela ho d'incuort suottascriet üna declaraziun d'intenziun per invier ils pass per pudair surpiglier il runel cumprais terrain, restaurant e piazza da giuver. «L'ideja es cha la vschinauncha fatscha diversas investiziuns in ed intuorn il runel. Per quellas investiziuns survain alura il cumün acziun e zieva ün tschert temp dess La Punt alura avair la



Investir per surpiglier il runel da skis Müsella. fotografia: Martin Camichel

magiurited da las acziun da la Skilift Müsella SA», disch Urs Niederegger, chanzlist cumünel da La Punt Chamues-ch.

Taunt per La Punt - scu eir per la gestiun dal runel scu tel - es que tenor il chanzlist ün buna soluziun cha'l «Müsella» saro in futur in possess e respunsabilitad da la vschinauncha. Impustüt perque cha quella ho dapü pussibilitads per svilupper e render pü attractiv l'areal dal runel ed «uschè eir sgürer il futur da la gestiun importanta per tuot il cumün», declera Urs Niederegger.

Nouva spüerta per famiglias

In lungia vista vuol la vschinauncha da La Punt uschè augmanter tuot la spüerta in ed intuorn il runel Müsella. Sper prolunger la stagiun d'inviern dess que impustüt eir der dapü activitads düraunt la sted. «La spüertas as dessan drizzer surtuot a famiglias cun ün nouv runel d'iffaunts ed ün parc da freestyle d'inviern. Da sted dess que der ün nouv

traget e parc da mountainbike scu eir üna nouva piazza da giuver pels pü giuvens», declera il chanzlist. Impü dess eir la spüerta gastronomica cun restaurant gnir mantgnida ed optimada. La gestiun da tuot l'implaunt da temp liber surpigliar tenor Urs Niederegger u bain la vschinauncha svesa u alura l'organisaziun da turissem «La Punt Ferien».

Uossa cha la declaraziun d'intenziun es suottascrieta e las discussiuns cul proprietari sun inviedas, vegnan elavuros il divers progets per las novas attracziuns. Cur cha'ls progets sajan sün maisa gnaron quels davaunt radunanza cumünela, chi dess alura decider davart ils singuls credits. «Impü ho la vschinauncha eir auncha da fer ün contrat cul proprietari per definir cura cha vain realiso chenün pass. Ma quist inviern giaro que auncha inavaunt scu üsito tal runel Müsella», disch Urs Niederegger. Martin Camichel/fmr